

Dismetter il castitg per maridai

■ **(anr/ld) Ina ga dapli dat il schinumnu castitg per maridai da discutir el parlament federal. En sesez ei la dismessa da quella malgestadad buca dispiteivla.** Il tribunal federal ha constatau gia igl onn 1984 che la situaziun ei buca conforma alla constituziun. Ina gronda part dils cantuns ha gia adattau la lescha fiscala en quei senn. Il cussegl federal ha formulau diversas gadas propostas per far las correcturas necessarias. Tochen uss ei la damonda denton restada pendent. Ils 28 da fevrer 2016 ha il suveran refusau péz a cup l'iniziativa dil pievel dalla pcd «Per létg e famiglia» cun 50,8%. 16 cantuns e miez han acceptau l'iniziativa. Sis ed in miez han detg na all'iniziativa. Aschia ha il parlament vinavon la pussivladad da far migliur. En vesta a quella situaziun ha il cusseglier dils stadis *Pirmin Bischof* (pcd/SO) inoltrau ina moziun el cussegl dils stans. El ha fatg attents sin la situaziun fiscala sin plaun federal.

Quella ei discriminonta per pèrs maridai e per pèrs registrai en cumparegliazion cun tals buca maridai ni pèrs che vivan sulets. Cun dir «gie» tier igl uffeci civil vegn ina gronda part dils maridai e maridai che retilan ina renta da l'AVS discriminada tier la taglia ni tier il dretg da renta. Pèrs maridai retilan in renta e mesa dall'AVS. Sche dus stattan ensemen senza esser en stan da letg survegnan els mintgamai duas rentas entiras. Quei sa esser ina differenza da tochen 14 000 francs ad onn. Quella malgestadad denter maridai e buca maridai cunterfetschi alla politica da famiglia e seigi finalmein da dismetter, pretenda Bi-

schof. Il cussegl dils stans ha acceptau la moziun.

Per il cussegl federal ha quella damonda ina aulta prioritad. El ha priu si la fatschenta en sias finamiras per igl onn proxim e vul preparar ina missiva tochen la fin digl onn. El stoppi denton era risguardar divers aspects sin meisa sco per exempel l'iniziativa per specialists, empruar d'eliminar fauls cudezs ella lescha da taglia e las novas sligiazions per l'imposiziun da taglia. Per quels motifs propona il cussegl federal da refusar la moziun.

Ussa sto la secunda combra sefatschentar cun la moziun Bischof. La cumissiun dil cussegl naziunal sut il presidi da *Susanne Leutenegger Oberholzer* propona cun 12 encunter 11 vuschs ed ina abstenziun d'acceptar la moziun e d'incumbensar il cussegl federal da formular ina lescha che procuri per las correcturas necessarias. Il cussegl naziunal ha spustau ier la debatta sin l'jamna proxima. En vesta al na dil cussegl federal e la proposta satella dalla cumissiun vegn la moziun bein ad haver ina greva posiziun.



Cusseglie dils stadis Pirmin Bischof ha inoltrau ina moziun che vul dismetter la malgestadad fiscala per maridai.